

## JAVA VI - E SHTUNË

### I

#### Leximi i parë (Heb 11, 1-7)

*Me anë të fesë e dimë se botërat u trajtuan prej fjalës së Hyjit.*

#### *Lexim prej Letrës së drejtuar Hebrenjve*

Vëllezër, <sup>1</sup> feja është një mënyrë pasjeje të sendeve që shpresohen, mjet të njihen sendet që nuk shihen. <sup>2</sup> Në fuqi të saj, madje, të parët tanë fituan një dëshmi të mirë.

<sup>3</sup> Me anë të fesë e dimë se botërat u trajtuan prej fjalës së Hyjit, në mënyrë që çka shihet u përftua nga ato që nuk shihen.

<sup>4</sup> Me anë të fesë Abeli i kushtoi Hyjit fli më të mirë se Kaini. Me anë të saj mori dëshminë se është i drejtë - Hyji u dha dëshmi dhuratave të tija - dhe, me anë të saj, edhe pse i vdekur, ende flet.

<sup>5</sup> Me anë të fesë Henoku ndërroi vend që të mos e shohë vdekjen dhe më nuk u gjet, sepse Hyji i ndërroi vend. E njëmend, para mbartjes mori dëshminë se i kishte pëlqyer Hyjit. <sup>6</sup> Por pa fe nuk është e mundshme t'i pëlqehet Hyjit, sepse ai që i afrohet duhet të besojë se Hyji është dhe se i shpërblen ata që e kërkojnë.

<sup>7</sup> Me anë të fesë Noehi, i mësuar prej Hyjit për gjëra që ende nuk shiheshin, i bindur në shpirt, e punoi arkën për shpëtimin e familjes së vet; me anë të fesë e dënoi botën dhe u bë trashëgimtari i drejtësisë që vjen nga feja.

#### *Fjala e Zotit*

#### **Psalmi 145 (144)**

#### ***Ref. DO TË BEKOJMË SË BASHKU EMRIN E ZOTIT***

<sup>2</sup> Çdo ditë do të të bekoj  
dhe do ta lavdëroj Emrin tënd  
përgjithmonë e jetës.

<sup>3</sup> Zoti është i madh e i lavdërueshëm,  
e pashqyrueshme është madhëria e tij!

<sup>4</sup> Breznia breznisë do t'ia tregojë veprat e tua  
dhe do ta shpallin pushtetin tënd.

<sup>5</sup> Do ta shpallin madhërinë e shenjtërisë sate,  
do t'i tregojnë mrekullitë e tua.

<sup>10</sup> Le të lavdërojnë, o Zot, të gjitha veprat e tua  
e le të bekojnë shenjtërit e tu.

<sup>11</sup> Le ta tregojnë lavdinë e Mbretërisë sate,  
le të kuvendin për pushtetin tënd.

## II

### **Leximi i parë** (Jak 3, 1-10)

*Gjuhën, asnjë njeri nuk mund ta mbizotërojë.*

#### ***Lexim prej Letrës së Shën Jakobit apostull***

<sup>1</sup> Vëllezërit e mi, mos u bëni shumë mësues, duke e ditur se do të gjykohe mi më rëndë. <sup>2</sup> Për të vërtetë, të gjithë gabojnë shumë.

Në qoftë se ndokush nuk gabon në fjalë, ai është njeri i përsosur, i aftë të sundojë mbarë trupin.

<sup>3</sup> Nëse kuajve u vëmë frerët në gojë për t'i vënë nën sundim, atëherë mund të drejtojmë me mbarë trupin e tyre. <sup>4</sup> Ja, edhe anijet: sa të mëdha janë ato dhe sa të forta erërat që i shtyjnë! E pra, një timon i vogël i drejton atje ku do timonieri! <sup>5</sup> Kështu edhe gjuha është një gjymtyrë e vogël, por mund të mburret për gjëra të mëdha.

Ja, një zjarr i vogël se ç'pyll të madh mund të djegë! <sup>6</sup> Po, edhe gjuha është zjarr! Një botë e tërë padrejtësie është gjuha midis gjymtyrëve tona, ajo që e fëlliq të gjithë trupin dhe, e ndezur nga ferri, e bën shkru mb të tërë jetën. <sup>7</sup> E njëmend, të gjitha llojet e egërsirave, të shpendëve, të zvarranikëve dhe të kafshëve të detit mund të zbuten dhe njerëzit i kanë vënë nën sundim, <sup>8</sup> kurse gjuhën - e keqe e paqetësueshme, plot vrer që sjell vdekjen - asnjë njeri nuk mund ta mbizotërojë. <sup>9</sup> Me të lavdërojmë Zotin edhe Atin, por me të edhe mallkojmë njerëzit e krijuar në përngjasimin e Hyjit: <sup>10</sup> prej të njëjtës gojë del bekimi dhe mallkimi. E pra, vëllezërit e mi, nuk duhet të ishte ashtu!

#### ***Fjala e Zotit***

#### **Psalmi 12 (11)**

***Ref. VËRE BEKIMIN TËND, O ZOT, NË BUZËT E MIA***

<sup>2</sup> Më shpëto, o Zot, se e pat shenjtji,  
sepse ndër bijtë e njerëzve u pakësuan besnikët!

<sup>3</sup> Të gjithë po e gënjejnë të afërmin e vet:

flasin me buzë shtiracake, me zemër të paçiltër.

<sup>4</sup> Thaji o Zot, të gjitha buzët shtiracake,  
edhe gjuhën që flet fjalë të mëdha!

<sup>5</sup> Ata thonë: "Fuqia jonë është gjuha,  
buzët tona janë tonat! Kush është zotëria ynë?"

<sup>7</sup> Fjalët e Zotit janë të pastra:

argjend i pastruar në zjarr,

i pastruar shtatë herë!

<sup>8</sup> Por ti, o Zot na ruaj

na mbro përherë prej kësaj breznie të mbrapshtë

**Aleluja!** Jezu Krishtin ju e doni edhe pse nuk e patë, në atë besoni edhe pse ende nuk e shihni dhe galdoni me gëzim të patregueshëm dhe të lavdishëm. (1 Pjt 1, 7-8)

**Aleluja!**

**Ungjilli** (Mk 9, 2-13)

*U shndërrua para tyre.*

**Leximi i Ungjillit të shenjtë sipas Markut**

Në atë kohë, <sup>2</sup> Jezusi i mori me vete Pjetrin, Jakobin e Gjonin e i çoi vetëm ata në vetmi, në një mal të lartë dhe u shndërrua para tyre. <sup>3</sup> Petkat e tija u bënë ndriçuese të bardha, sa që asnjë zbardhues mbi tokë nuk mund t'i zbardhojë ashtu.

<sup>4</sup> Atyre ju dukën Elia me Moisiun e po bisedonin me Jezusin.

<sup>5</sup> Pjetri atëherë mori fjalën e i tha Jezusit: »Rabbi, për ne është mirë të qëndrojmë këtu. Po i ndërtojmë këtu tri tenda: një për ty, një për Moisiun e një për Elinë.« <sup>6</sup> Në të vërtetë s'dinte çka të thoshte tjetër, sepse ishin trembur keqas.

<sup>7</sup> Ndërkaq u duk një re dhe i mbuloi me hijen e vet e prej resë u dëgjua një zë: »Ky është Biri im - djali i Dëshirit! Atë dëgjoni!« <sup>8</sup> Menjëherë shikuan rreth e rrotull e nuk panë askënd tjetër, përveç vetëm Jezusit me ta.

<sup>9</sup> Ndërsa po zbritnin nga mali, Jezusi u urdhëroi që të mos i tregojnë askujt çka panë deri që Biri i njeriut të mos ngjallet prej së vdekuri. <sup>10</sup> Ata e mbajtën porosinë, por njëri-tjetrin e pyesnin çka do të thotë ajo fjalë: »të ngjallet prej së vdekuri?« <sup>11</sup> Dhe e pyetën: »Përse skribët thonë se më parë duhet të vijë Elia?«

<sup>12</sup> »S'ka dyshim - u përgjigji - më parë duhet të vijë Elia për të vënë përsëri çdo gjë në vendin e vet. Por, pse atëherë u shkrua për Birin e njeriut se i duhet të pësojë shumë e të përbuzet?

<sup>13</sup> Veçse, unë po ju them: Elia erdhi e bënë me të si deshën, po ashtu siç shkruan për të në Shkrimin shenjt.«

***Fjala e Zotit***